



აკაკი წერეთლის სახელმწიფო  
უნივერსიტეტის აკადემიური საბჭო

ACADEMIC BOARD OF AKAKI  
TSERETELI STATE UNIVERSITY

თამარ მეფის ქ. № 59  
მის: 4600, საქართველო, ქუთაისი

ტელ: (+995 331) 4 21 73 ფაქსი (+995 331) 4 38 33  
ელ.ფოსტა atsu@atsu.edu.ge

აკაკი წერეთლის სახელმწიფო უნივერსიტეტი  
აკადემიური საბჭო  
5 აპრილი, 2019

### დადგენილება № 42(18/19)

აკაკი წერეთლის სახელმწიფო უნივერსიტეტის აკადემიური საბჭოს 2017 წლის 10 ნოემბერის დადგენილებაში №9 (17/18) აწსუ სტუდენტების მიერ განსხვავებული და/ან დავალიანებაში დარჩენილი კრედიტების ათვისების, პირობების და ფინანსური ვალდებულების შესრულების წესში ცვლილებების შეტანისა და დამტკიცების შესახებ

უმაღლესი განათლების შესახებ საქართველოს კანონი 44-ე, 49<sup>2</sup> მუხლის მე-4 პუნქტი, აკაკი წერეთლის სახელმწიფო უნივერსიტეტის წესდების, წარმომადგენლობითი საბჭოს დადგენილების (№17,6.04.2015) საფუძველზე, აწსუ სტუდენტების მიერ განსხვავებული და/ან დავალიანებაში დარჩენილი კრედიტების ათვისების, პირობების და ფინანსური ვალდებულების შესრულების წესში (აკადემიური საბჭოს 2017 წლის 10 ნოემბერის დადგენილება №9 (17/18) შევიდეს ცვლილებები და დამტკიცდეს თანდართული ფორმით.

აკადემიური საბჭოს  
თავმჯდომარე, რექტორი:

პროფ. როლანდ კოპალიანი

## თავი I. ზოგადი დებულებანი

### მუხლი 1. რეგულირების სფერო

1.1. წინამდებარე წესი განსაზღვრავს უნივერსიტეტში საფეხურების მიხედვით სტუდენტის მიერ განსხვავებული და/ან დავალიანებაში დარჩენილი კრედიტების ათვისების, პირობების და ფინანსური ვალდებულების შესრულების პროცედურულ საკითხებს.

### მუხლი 2. აწესი სტუდენტთა მიერ განსხვავებული და/ან დავალიანებაში დარჩენილი კრედიტების ათვისება

2.1. სტუდენტს უფლება აქვს სასწავლო წლის განმავლობაში აითვისოს მაქსიმუმ 75 კრედიტი, მაგრამ არაუმეტეს 40 კრედიტისა სემესტრში, რისთვისაც იგი უნივერსიტეტში საგანმანათლებლო პროგრამის დასრულებისათვის საჭირო ნორმატიულ ვადაში (ბაკალავრიატი 4 სასწავლო წელი, ერთსაფეხურიანი 5-6 სასწავლო წელი, მაგისტრატურა 2 სასწავლო წელი, დოქტორანტურა 3 სასწავლო წელი) იხდის მიმდინარე სემესტრის ასათვისებელი კრედიტების შესაბამისი ოდენობის საფასურს.

2.2. განსხვავებული და/ან დავალიანებაში დარჩენილი კრედიტების ათვისებისათვის სტუდენტმა:

ა) უნდა გაიაროს რეგისტრაცია სასწავლო პროცესის მართვის ელექტრონულ სისტემაში.

ბ) სასწავლო გეგმის სემესტრული კონფიგურაციით გათვალისწინებული საგნების გარდა, სტუდენტს უფლება ეძლევა აითვისოს განსხვავებული და/ან დავალიანებაში დარჩენილი კრედიტები შესაბამის სემესტრში საგანმანათლებლო პროგრამის გავლის პარალელურად ან/და დამატებითი სემესტრის (სემესტრების) განმავლობაში პირადი განცხადების საფუძველზე, შესაბამისი ანაზღაურებით.;

2.3. იმ შემთხვევაში, თუ სტუდენტს აქვს აკადემიური დავალიანება და სურვილი აქვს მიმდინარე სემესტრში აითვისოს მხოლოდ დავალიანებაში დარჩენილი კრედიტები განმეორებით, საკუთარი განცხადებისა და კრედიტებისათვის საჭირო სწავლის საფასურის ქვითრის წარმოდგენის საფუძველზე მიეცეს მას შესაბამის სემესტრზე განმეორებით რეგისტრაციის უფლება საგანმანათლებლო პროგრამის სასწავლო კურსის დაფიქსირებით. კრედიტების ასათვისებლად სწავლის საფასური განისაზღვროს მოცემული სასწავლო წლისათვის საგანმანათლებლო პროგრამის 1 კრედიტის ღირებულების პროპორციულად, სწავლის ნორმატიული ვადის გათვალისწინებით, მასთან გაფორმებული ხელშეკრულების საფუძველზე;

2.4. ნორმატიული ვადის გასვლის შემდეგ, თუ სტუდენტმა სრულად ვერ აითვისა საგანმანათლებლო პროგრამით გათვალისწინებული კრედიტები, მასსა და უნივერსიტეტს შორის ფორმდება ახალი ხელშეკრულება, საგანმანათლებლო პროგრამის დასრულებისათვის მოცემული პროგრამის სწავლის საფასურის შენარჩუნებით (მაგრამ არაუმეტეს ორი სემესტრისა).

2.5. იმ შემთხვევაში, თუ სტუდენტი საგანმანათლებლო პროგრამით გათვალისწინებულ კრედიტებს სრულად ვერ აითვისებს ვერც ამ წესის 2.1. და 2.4 პუნქტით განსაზღვრულ ვადებში, სტუდენტის მიერ სწავლის გაგრძელების სურვილის გამოხატვის შემთხვევაში, მასსა და უნივერსიტეტს შორის გაფორმდეს ახალი ხელშეკრულება და სტუდენტის ფინანსური ვალდებულება განისაზღვროს მოცემულ სასწავლო წელს შესაბამისი საგანმანათლებლო პროგრამისათვის

დადგენილი სწავლის საფასურის მიხედვით, ასათვისებელი კრედიტების მოცულობის გათვალისწინებით.

2.6. მობილობით გადმოსული სტუდენტი, რომელიც მიმდინარე სემესტრში, წინაპირობებიდან გამომდინარე, ითვისებს მხოლოდ რამდენიმე სასწავლო კურსს, სწავლის საფასურს იხდის ამ წესის 2.1, 2.2. და 2.3 პუნქტის პრინციპის შესაბამისად;

2.7. მობილობით გადმოსულ სტუდენტებს შესაბამისი ხელშეკრულება გაუფორმოს აწესი ხარისხის მართვის სამსახურის „მობილობის ხელშეწყობისა და კრედიტების აღიარების სექტორმა“ ფაკულტეტიდან მოწოდებული შესაბამისი დასკვნებისა და ინფორმაციის საფუძველზე.

2.8. ფაკულტეტის ადმინისტრაციამ, შესაბამისი ინდივიდუალური სამართლებრივი აქტით, ამ წესის 2.1, 2.3, 2.4, 2.5 და 2.6 პუნქტებით განსაზღვრული კატეგორიის სტუდენტებს დაუდგინონ განსხვავებული (ასათვისებელი) კრედიტების ოდენობა, სწავლის საფასური და 2.1, 2.4, 2.5 და 2.6. პუნქტის შესაბამის სტუდენტებს უფორმებს ახალ ხელშეკრულებებს.

2.9. უნივერსიტეტის მიერ გაფორმებული მემორანდუმებისა და საერთაშორისო ხელშეკრულებების საფუძველზე, საერთაშორისო გაცვლით პროგრამებში მონაწილე სტუდენტებს სტუდენტის სტატუსი არ უჩერდება და ისინი სწავლის საფასურს იხდიან უნივერსიტეტსა და სტუდენტს შორის გაფორმებული ხელშეკრულების საფუძველზე.

2.10. ამ წესის განხორციელება დაევალოთ ფაკულტეტის დეკანებს და უნივერსიტეტის ფინანსური და მატერიალური რესურსების მართვის სამსახურს.

## **თავი II. სტუდენტთა მიერ უნივერსიტეტთან გაფორმებული ხელშეკრულებით ნაკისრი ფინანსური ვალდებულების შესრულების პირობები**

### **მუხლი 3. ხელშეკრულებით ნაკისრი ფინანსური ვალდებულების შესრულების პირობები**

3.1. უნივერსიტეტში სწავლის ქირის გადახდის ყოველკვარტალური ვადებია: **20 სექტემბერი, 20 დეკემბერი, 20 მარტი და 20 მაისი.**

3.2. ხელშეკრულების შესაბამისად, სწავლის საფასურის ყოველკვარტალური შენატანის გადახდის ვადის გასვლის შემდგომ:

ა) საფინანსო სამსახური გონივრულ ვადაში (4-5 დღე) აწოდებს ფაკულტეტებს ინფორმაციას სტუდენტთა დავალიანების შესახებ, ყოველკვარტალური გადახდის ვადების მდგომარეობით.

ბ) ფაკულტეტები ამუშავებს მიღებული ინფორმაციას და ამზადებს ბრძანებას სტატუსის შეჩერების შესახებ, ყოველკვარტალური შენატანის გადახდის ბოლო ვადიდან არაუგვიანეს 15 დღისა. ამასთან, გადახდის ვადის დასრულების შემდგომ, სტატუსის შეჩერებამდე დავალიანების დაფარვის შემთხვევაში, გადახდის დამადასტურებელი დოკუმენტი სტუდენტმა უნდა წარადგინოს ფაკულტეტის მდივანთან.

გ) სტატუსის შეჩერების ბოლო ვადიდან არაუგვიანეს 15 დღის განმავლობაში, თანხის გადახდის შემთხვევაში, სტუდენტს შეიძლება აღუდგეს სტატუსი. აღნიშნული ვადის გასვლის შემდგომ სტატუსის აღდგენის საკითხი მიმდინარე სასწავლო წლის განმავლობაში არ განიხილება, გარდა იმ შემთხვევისა, როდესაც:

გ.ა. სტუდენტი განმეორებით რეგისტრირდება წინა პერიოდის განმავლობაში აკადემიურ დავალიანებაში დარჩენილი სასწავლო კურსების ასათვისებლად და სწავლის საფასურს იხდის ამ წესის 2.1, 2.3 და 2.4 პუნქტის შესაბამისად.

გ.ბ. სტუდენტს შესაძლებლობა აქვს გავიდეს მიმდინარე სემესტრით გათვალისწინებული სასწავლო კურსების გარკვეული ნაწილის სწავლის შედეგზე, მედიცინის ერთსაფეხურიან საგანმანათლებლო პროგრამებზე კურაციული სწავლების სისტემის სპეციფიკიდან გამომდინარე.

3.3. გამონაკლის შემთხვევაში, თანხის გადახდის გადავადება (ეტაპობრივი გადახდის უფლება) შესაძლებელია დეკანის დასაბუთებული შუამდგომლობით, რექტორის ან ადმინისტრაციის ხელმძღვანელის თანხმობით.

3.4. თუ სტუდენტმა სწავლის საფასური არ გადაიხადა ამ წესით განსაზღვრულ ვადებში (პუნქტი II, 3.1.) და გადახდა განახორციელა დაგვიანებით II, 3.2 გ. ქვეპუნქტით განსაზღვრული ვადის გასვლის შემდგომ, რის გამოც, მისი სტუდენტის სტატუსი არ ექვემდებარება აღდგენას, სტუდენტს მისი სურვილის თანახმად (რაც უნდა გამოხატოს წერილობით), შესაძლებელია დაუბრუნდეს თანხა, ან ჩათვალოს მომავალში ფინანსური ვალდებულების დაფარვაში, სწავლის საფასურის მოცულობის გათვალისწინებით.

3.5. სტუდენტს, რომელმაც მოიპოვა პროგრამული დაფინანსება, უმაღლესი საგანმანათლებლო დაწესებულებებში სოციალური პროგრამის ფარგლებში სტუდენტის სახელმწიფო სასწავლო გრანტი ან გაიუმჯობესა სახელმწიფო სასწავლო გრანტი, ზედმეტად გადახდილი სასწავლო ქირა შესაძლებელია დაუბრუნდეს, თუ მიმდინარე პერიოდისთვის მას არ გააჩნია აკადემიური დავალიანება. სხვა შემთხვევაში ზედმეტი თანხა ბრუნდება კვალიფიკაციის მინიჭების ან სტუდენტის სტატუსის შეწყვეტის შემთხვევაში.

**თავი III. აკაკი წერეთლის სახელმწიფო უნივერსიტეტი აკადემიური საბჭოს 5.04.2019 წლის № 42(18/19) დადგენილების მუხლი 2 -ის 2.1. და 2.2 პუნქტების ძალაში შესვლის შესახებ**

**მუხლი 4. აკაკი წერეთლის სახელმწიფო უნივერსიტეტი აკადემიური საბჭოს 5.04.2019 წლის № 42(18/19) დადგენილების მუხლი 2 -ის 2.1. და 2.2 პუნქტების ძალაში შესვლის შესახებ**

4.1. აკაკი წერეთლის სახელმწიფო უნივერსიტეტი აკადემიური საბჭოს 5.04.2019 წლის № 42(18/19) დადგენილების მუხლი 2 -ის 2.1. და 2.2 პუნქტები ძალაში შევიდეს 2019 წლის პირველი სექტემბრიდან 2019-2020 სასწავლო წელს აწსუ-ში ჩარიცხული პირველი სასწავლო წლის სტუდენტებისათვის.